

# مراهقه

حد كبير

وف سنك

ويحب!!

وينسى بعض ملامحه

على كرسي ف نادي

ويضم إيدى حلوين  
أصغر من أيامه الباقيه  
وأنعم من " آه "  
وهيه بتخرج من بنت رقيقه  
وتخش ف قلب رومانسي  
مش عايز يفهم قوانين اللعبه  
وأصول الشغل  
زي صحابه ما فهموا  
وداسوا عليه.

لسه بتحلم بزمن ثاني  
وتفرغ حيرتك ف سيجاره  
وأحياناً كاس  
لسه بتحلم رغم تجاربك  
وكانك تلميذ ف اعدادي  
خطف له معاد بالصدفه  
مع واحده أكبر منه  
في مجلة سكس.

حد ف سنك برضه  
تتخدر أعصابه  
وتزن  
وكأنه سالفله مراهقه جديده  
وشوية ابتسامات  
من بيع متجول  
بيبيع الفل  
والأحلام  
ع الكورنيش.

ماتبررش ظروفك  
ما تقولش الحب مالوش ف السن  
وف الأولاد  
ماتقولش كلام ح تخاف ما تقوله  
وانت بتفرد طولك جنب مراتك  
ووراكم صوره قديمه  
طالع منها رنين زغاريد  
وعواطف ساقعه.

والنبي إنسى  
حد ف سنك يضحك من قلبه  
ويلحس ف الشارع دولسي  
ويأنش بنت جميله  
مع إن الطعنات النافذه ف صدرك  
ولسه بتنزف  
عليها اسم صحابك  
وحبيبه قديمه  
وحزن يوماتي بيخرج  
من شاشة التلفزيون.

انسى يا عم الحاج  
فوق  
بص لصورتك ع الحيطه  
وهيه بتنظر لك بكآبه  
وبغيظ  
وتخوّد وشها للناحيه الثانيه  
من غير حد ما ياخذ باله  
وينادي عليك.

أغسطس ٢٠٠١